

08 SEP 2000

Mahathir-Konvensyen

UMNO AKAN TERUS PERJUANGKAN ISLAM DALAM SEMUA ASPEK HIDUP

JOHOR BAHRU, 8 Sept (Bernama) -- Perdana Menteri Datuk Seri Dr Mahathir Mohamad berkata Umno akan terus memperjuangkan dan memartabatkan Islam dalam semua aspek penghidupan.

Dr Mahathir yang juga Presiden Umno berkata perjuangan keislaman Umno adalah jelas dari segala aspek demi menegakkan syiar Islam, membangun tamadun bangsa dan memajukan negara.

"Bukanlah mudah untuk mempunyai sistem pendidikan, perbankan dan insurans yang komprehensif dan efisien dengan pelaksanaan secara Islam. Namun, kita telah berjaya melaksanakannya dan dunia Islam juga ingin mempelajari dari kita.

"Secara berperingkat-peringkat juga sistem perundangan Islam kita ketengahkan," katanya dalam kata-kata aluan yang dimuatkan dalam buku cenderamata sempena Konvensyen Umno Johor 2000 yang akan berlangsung di Batu Pahat, esok.

Konvensyen dua hari itu akan dihadiri lebih 400 anggota perwakilan dari 20 bahagian Umno di seluruh Johor. Ia akan dirasmikan oleh Timbalan Perdana Menteri Datuk Seri Abdullah Ahmad Badawi.

Tema konvensyen ini ialah "Hidup Melayu Bersatu" yang bertujuan untuk mengupas persoalan mengenai cabaran yang dihadapi orang Melayu dan Umno serta membincangkan agenda kerja parti itu.

Dr Mahathir juga berkata Barisan Nasional (BN) yang diterajui oleh Umno telah berupaya mewujudkan keharmonian dan perpaduan kaum di negara ini.

Menurutnya, kaum yang pelbagai dan pegangan agama yang berbilang tidak pernah menghalang rakyat hidup secara damai dalam kesepakatan malah dapat menikmati kemakmuran negara dalam suasana yang penuh adil dan saksama.

"Kita mengambil sikap bersatu di dalam kepelbagaian. Dengan beraninya kita menerokai satu gagasan baru bagi mewujudkan bangsa Malaysia yang bersatu. Ini merupakan lanjutan daripada struktur masyarakat yang telah sedia diperjuangkan," katanya.

Beliau berharap konvensyen ini akan dapat menggerakkan semangat perpaduan orang Melayu dalam mencari idea dan fikiran bernas bagi mempertahankan kedaulatan bangsa, agama dan negara.

Sementara itu, Abdullah dalam ucapan kata-kata aluannya berkata rakyat perlu memperkukuhkan kemantapan perpaduan yang sedia wujud bagi menjamin kelangsungan kedaulatan negara.

Menteri Besar Datuk Abdul Ghani Othman pula mengajak orang Melayu terus bersatu padu bagi mengukuhkan Umno yang menjadi nadi perjuangan bangsa.

-- BERNAMA

BH NMO